

Efterskolit aamma atuarfiit ilaanni najugaqarnermut aamma paarlaasseqatigiilluni nunami allamiinnermut tapiissuteqartarneq pillugit inatsisartut inatsisaat pillugu Namminersorlutik Oqartussat nalunaarutaat

Matumuuna Efterskolit pillugit inatsisartut inatsisaat nr. 13, 5. decembari 2008-meersoq, Inatsisartut inatsisaat nr. 17, 3. Decembari 2012-imi aamma inatsisartut inatsisaat nr. 77, 21. Novembari 2025-imi allannguutitalinni nalunaarutigineqarpoq.

Kapitali 1

Nassuiaat siunertarlu

§ 1. Efterskole tassaavoq suliffeqarfik imminut pigisoq, atuartitsinermik ataatsimoornissamillu neqerooruteqartoq, ilinniartut inuttut tamakkiisumik inerikkiartornissaat, kiisalu nalinginnaasumik perorsarneqarlutillu ilinniarnissaat siunertaralugu qaammarsaanermik demokratiilu tunngavigalugu peroriartornissamik pingaarnertut anguniagaqartoq.

Imm. 2. Atuartitsineq neqeroorutaasoq tamatigoortuussaaq. Efterskolit ingerlatsinerat namminneq pingaartillugu tunngavissamittut toqqagaat aallaavigalugu aaqqissuunneqassaaq. Atuartitsissutit ataasiakkaat imaluunniit atuartitsissutit qanitariissut pingaartinneqarnerullutik inissisimasinnaapput, kisiannili nalinginnaasumik perorsaaneq ilinniartitaanerlu taarsernagit.

Imm. 3. Efterskole Inatsisartut inatsisaannut matumunnga ilaasutut isigineqassaguni Naalakkersuisunit akuerisaasariaqarpoq, tak. § 7, imm. 1.

Imm. 4. Efterskolit, ilinniartunik atuarfik pillugu peqqussut naapertorlugu atuartitaasussaataasunik ilinniartortaassagunik, ilinniartunut taakkununga atuartitsineq nalinginnaasumik meeqqat atuarfianni piumasaqaataasunut nallersuussinnaasoq neqeroorutigissavaat.

Imm. 5. Ilinniartut atuartitaasussaataasut atuartitsinermik, meeqqat atuarfianni inaarutaasumik naliliinernut misilitsinnernullu qaqugukkulluunniit atuuttunut piareersaataasinnaasumik, neqeroorfigineqassapput. Ilinniartut taakku efterskolernertik inaarutaasumik naliliinermik misilitsinnermillu naggasissavaat.

Imm. 6. Ilinniartut ukiumikkut atuartitaasussaataajunnaareersut atuartitsinermik, meeqqat atuarfianni inaarutaasumik naliliinernut misilitsinnernullu qaqugukkulluunniit atuuttunut piareersaataasinnaasumik, neqeroorfigineqarsinnaapput. Ilinniartut taakku efterskolernertik inaarutaasumik naliliinermik misilitsinnermillu naggasersinnaavaat.

Imm. 7. Naalakkersuisut efterskolip pisortaa pisinnaatissavaat, meeqqat atuarfianni inaarutaasumik naliliinerit misilitsitsinerillu pillugit malittarisassat qaqugukkulluunniit atuuttut naapertorlugit, inaarutaasumik naliliinernik misilitsinnernillu ingerlatsisinnaatillugu.

Imm. 8. Naalakkersuisut efterskolip inaarutaasumik naliliinernik misilitsinnernillu qaqugukkulluunniit atuuttunik ingerlatsisinnaanera atorunnaarsissinnaavaat, efterskolip malittarisassat taakku pillugit qaqugukkulluunniit atuuttut maleruanngippagit.

§ 1a. Paarlaasseqatigiinneq tassaavoq inuusuttut 18-it inorlugit ukiullit Kalaallit Nunaata Danmarkillu avataaniinnerat, inuusuttut ilinniakkatigut, inuttut naalagaaffillu akimorlugit kulturit pillugit piginnaasaannik nukittorsaanissamik siunertaqartoq.

Kapitali 2

Ilinniartussanik akuersineq

§ 2. Efterskolit ilinniartut efterskolertussatut akuerisassavaat.

Imm. 2. Efterskolit oqaaseqaateqartereernerisigut qinnuteqarnermi aamma ilinniartussanik akuersinermi periusissat Naalakkersuisut aalajangersarsinnaavaat.

§ 3. Efterskolini ilinniartut ukiuni 8-ni atuarnertik naammassisimassavaat imaluunniit 14-inik ukioqalereersimallutik 18-inillu ukioqalereersimassanatik. Ilinniartut 18-inik ukioqalereersimasut immikkut pisoqartillugu peqataatinneqarsinnaapput, malittarisassat Naalakkersuisunit aalajangersarneqartut naapertorlugit.

Pisortaqarneq

§ 4. Efterskolit suliffeqarfittut imminnut pigisutut ingerlanneqassapput, qullersaallutillu aqutsisut tassaassallutik siulersuisut.

§ 5. Siulersuisut efterskolip ingerlatsinera piffissarlu ungasinnerusoq eqqarsaatigalugu ineriartornissaa pillugu tunaartarisassanik aalajangersaassapput. Siulersuisut sammisassanut pilersaarutit aalajangersassavaat, taakkualu siunertamut, tak. § 1, naapertuuttuunissaat akisussaaffigalugu.

Imm. 2. Siulersuisut efterskolip pisortaa atorfinitsillugulu soraarsittarpaat.

Imm. 3. Siulersuisut efterskolip ileqqoreqqusaa suliarissavaat, siulersuisullu ingerlatsinerminni suleriaassissaat aalajangissallugu.

§ 6. Pisortaq perorsaanermut tunngasunut akisussaavoq efterskolillu ulluinnarni aqutarinera isumagalugu. Pisortap qularnaassavaa, efterskolip ingerlatsinermi malittarisassat tamanna pillugu atuuttut tunaartarisassallu siulersuisunit aalajangersakkat naapertorlugit aqunneqarnissaa.

Imm. 2. Pisortap efterskolimi suleqataasut atorfinitsillugillu soraarsittarpai.

Kapitali 3

Efterskolinik akuersineq

§ 7. Naalakkersuisut efterskole akuerisinnaavaat

- 1) efterskolip ileqqoreqqusaa Naalakkersuisunit akuerineqarsimappat aamma
- 2) efterskole naapertuuttunik inissaqarlunilu naapertuuttunik atortoqarpat.

Imm. 2. Efterskolip ileqqoreqqusaa makku pillugit paasissutissanik imaqassaaq:

- 1) Suliffeqarfiup imminut pigisup taaguutaa.
- 2) Kommune, suliffeqarfiup imminut pigisup najugaqarfigisaa.
- 3) Suliffeqarfiup imminut pigisup siunertaa.
- 4) Suliffeqarfiup imminut pigisup pigisaasa pilersinneqarnerminilu imminerisaminik aningaasaataasa annertussusaat.
- 5) Pilersitsisuusup allalluunniit immikkut pisinnaatitaaffii iluaqutissarisaa luunniit.
- 6) Siulersuisunut ilaasortat katitigaanerat amerlassusaallu, qanoq toqqarneqartarnerat piffissallu atuuffisa sivilissusaa.
- 7) Naatsorsuuserinermut malittarisassat.
- 8) Sinneqartoorutit atornissaat.

Imm. 3. Efterskolit siulersuisuisa ukiumi efterskolip aallartiffissaatut pilersaarutaasumi kingusinnerpaamik 1. marts ileqqoreqqusat akuerisaasut Naalakkersuisunut nassiutereersimassavaat.

§ 8. Naalakkersuisut akuersissut atorunnaarsissinnaavaat, efterskolip § 7, imm. 1-imi piumasaqaatit eqquutissinnaajunnaarpagit. Aammattaaq naalakkersuisut akuersissut atorunnaarsissinnaavaat, efterskolip atuartitsinera pissutsillu allat, § 1-imi aalajangersakkanut ersarissumik akertilusutut isumaqarfigineqarpata.

Imm. 2. Imm. 1-imi oqaaseqatigiit aappaat naapertorlugu akuersissummik atorunnaarsitsineq taamaallaat pisinnaavoq, iliuutsit annertunnginnerusut misilinneqareersimappata.

Kapitali 4

Efterskolinut tapiissutit

§ 9. Efterskolit Inatsisartut inatsisaat manna naapertorlugu tapiiffigineqarsinnaassagunik Naalakkersuisunit akuerisaassapput, tapiissuteqartarnermullu piumasaqaatit piviusunngortissimassallugit, tak. §§ 10 - 11.

§ 10. Inatsisartut Aningaasanut Inatsisaanni aalajangersarneqartut iluanni Naalakkersuisut, efterskolinut akuerisaasunut tapiissuteqartarput (tunngaviumik tapiissutit, taxameteri malillugu tapiissutit, ilinniartut akiliutaasa annikillissinnissaannut isertitat aallaavigalugit tapiissutit) piumasaqaatit makkua aallaavigalugit:

- 1) Efterskolit pisortaat ilinniartitsisuilu akissaateqartinneqassapput Naalakkersuisut isumaqatigiissuteqarfigisinnaasaasa iluanni atorfiit assingusut pillugit aalajangersakkat naapertorlugit. Atorfininnermi atugassarititaasut allat allakkatigut isumaqatigiissutigineqassapput.
- 2) Efterskolip Naalakkersuisunut uppersarsassavaa atuarfiup pisortaata ilinniartitsisuisalu naammaginartumik soraarnerussutisiassaqaarnissaasa qularnaarneqarnera.
- 3) Siulersuisut ukiumoortumik nalunaarusiaq, naatsorsuutini kukkunerisukkanik aamma aningaasartuutissat isertitassallu missingersersuusiorterannik ilaqartoq Naalakkersuisunut

nassiutissavaat.

4) Efterskolip ingerlassassanik pilersaarutai Naalakkersuisunit akuerisaassapput.

§ 11. Inatsisartut Aningaasanut Inatsisaanni aalajangersarneqartut iluanni Naalakkersuisut efterskolinut tapiissuteqartarput,

- 1) tapiiffigineqarsinnaasumik sapaatip-akunnerini 40-ni atuartitsinermik ingerlatsisoqarpat,
- 2) atuartitsineq efterskolernertut aaqqissuunneqarpat,
- 3) efterskolernerit tamarmik minnerpaamik sapaatip-akunnerinik 40-nik sivirususeqarpata, aamma
- 4) tapiiffigineqarsinnaasumik atuartitsinermik ingerlatsinerup iluani ukioq naallugu ilinniartut minnerpaamik 24-uppata.

§ 12. Naalakkersuisut efterskolinut ataasiakkaanut ukiumoortumik tunngaviumik tapiissuteqartarput, ukiut tamaasa Inatsisartut Aningaasanut Inatsisaanni aalajangersarneqartunik.

§ 13. Naalakkersuisut taxameteri malillugu tapiissuteqartarput, efterskolip ukiumut ilinniartuisa amerlassusaat kisitsimmik, ukiumoortumik Inatsisartut Aningaasanut Inatsisaanni aalajangerneqartumik, amerlisarnerat aallaavigalugu.

Imm. 2. Efterskolip ukiumoortumik ilinniartuisa amerlassusaat tassaavoq, ukiumi ataatsimi sapaatip-akunnerini pikkorissarfusuni ataasiakkaani, ilinniartut amerlassusaasa katinnerat 40-mik agguarlugu. Sapaatip-akunnera pikkorissarfusoq tassaavoq ullut-unnuallu pikkorissarfiit 7-it.

Imm. 3. Efterskolinut pilersinneqarlaanut, sulilu ukioq aningaasanut inatsiliorfusoq sioqqullugu taxameteri malillugu tapiiffigineqanngitsunut, ilinniartut akuerisatut aalajangikkat amerlassusaat aallaavineqassaaq.

Imm. 4. Naalakkersuisut efterskolinut taxameteri malillugu tapiissutit naatsorsornissaat, tunniunniissaat aqutarinissaallu pillugit malittarisassanik aalajangersaasinnaapput, taakkununga ilanngullugit ukiumoortumik ilinniartut ikinnerutillugit sapaatip-akunnerisalu atuartitsiviusut ingerlanneqartut ikinneruneranni taxameteri malillugu tapiissutit ikilisinnissaat pillugit aalajangersakkat.

§ 14. Ilinniartut efterskolinut akiliutissaasa annikillisinnissaannut, isertitat aallaavigalugit aalajangerneqartunik, Naalakkersuisut tapiissuteqartarput. Tapiissutit inummut ataatsimut tapiissutitut, Naalakkersuisunut ilinniartup akiliutaata appartinneqarnissaanik qinnuteqartoqareerneratigut, tunniunneqartarput. Ilinniartunut tapip annertussusissaa ukiumoortumik Inatsisartut Aningaasanut Inatsisaanni aalajangerneqartassaaq.

Imm. 2. Ilinniartup akiliutaanik annikillisaanissamut tapiissutit efterskolimut tunniunneqassapput.

Imm. 3. Naalakkersuisut aalajangersinnaavaat ilinniartunut tapiissutit allaffissornikkut aqutarinerat kommunalbestyrelsimi isumagineqassasoq.

Imm. 4. Naalakkersuisut aalajangersinnaavaat, ilinniartunut tapit Namminersornerullutik Oqartussat ataanni suliffeqarfimmit immineertumit allaffissornikkut isumagineqassasut, ilinniartunullu tapit allaffissornikkut ingerlannissaannut pisussaaffiliinnaallutik.

Imm. 5. Ukiumoortumik Inatsisartut Aningaasanut Inatsisaanni skalatut aalajangerneqassaaq, isertitatigut tunngaviusut isertitallu aallaavigalugit ilinniartumut tapip aningaasartaasa akornanni naleqqiussissutissaaq. Angajoqqaat isertitamikkut tunngaviisa appartinnissaat aalajangersarneqassaaq,

ilinniartup efterskolernerup aallartinnerani qatanngutaasa 18-it inorlugit ukiullit amerlassusaat aallaavigalugu.

Imm. 6. Isertitatigut tunngaviusoq tassaavoq, ullorsiutit malillugit ukiumi piffissap tapiiffiusup aallartiffiata siornatigut ukiut aappaanni, nammineerluni isertitarisat annertussusaat.

Imm. 7. Naalakkersuisut isertitatigut tunngaviusoq imm. 5-imi taaneqartoq sanioqqussinnaavaat, angajoqqaat uppersarsarsinnaappassuk malunnaatilinnik isertitatigut allanngortoqarsimanera.

§ 15. Naalakkersuisut efterskolernerup aallartinnerani ilinniartup angerlarsimaffianiit efterskolimut angalaneranut aamma kipitinnerani naammassineranilu efterskolimiit angerlarsimaffianut angalanermi aningaasartuutit akilissavaat.

Imm. 2. Qanigisat perulunneranni imaluunniit toquneranni angerlarsimaffimmut utimullu ilinniartup angalaneranut aningaasartuutit Naalakkersuisut akilissavaat.

Imm. 3. Tapiissutit imm. 1 aamma 2 naapertorlugit tunniunneqartut efterskolimut aningaasartuuteqartuusumut tunniunneqassapput.

§ 16. Efterskolit pisortaasa ilinniartitsisuisalu ilinniartuarnissaat siunertaralugu pikkorissaanernut Naalakkersuisut tapiissuteqarsinnaapput.

Imm. 2. Pisortat ilinniartitsisullu ilinniaqqinnerminni piffissap ilaa tamakkiisumilluunniit sulinngiffeqartut akissarsiaqartinnerinut Naalakkersuisut tapiissuteqarsinnaapput.

Imm. 3. Tapiissutit imm. 1 aamma 2 naapertorlugit tunniunneqartut efterskolimut aningaasartuuteqartuusumut tunniunneqassapput.

§ 17. Immikkut atuartitsinermit aamma allatigut immikkut perorsaanikkut ikiorsiinissamut tapiisarnissaq pillugu Naalakkersuisut malittarisassalorsinnaapput.

§ 18. Efterskolit siunertamik iluanni Naalakkersuisunit tapiissutit isertitallu allat ataatsimut isigalugit atornissaat namminneq aalajangersinnaavaat. Taamaattoq piumasaqaataavoq atuartitsinerup tapiiffigineqartup, malittarisassat atuuttut naapertorlugit atuartullu tapiiffigineqartut amerlaqataannut ingerlanneqarnissaa.

Imm. 2. Efterskolit aningaasaliissutit atorineqanngitsut ukiup naatsorsuiffiusup tullianut nuussinnaavaat.

§ 19. Naalakkersuisut tapiissutit utertitsinissaq unitsitsinissarluk pillugit malittarisassanik aalajangersaasinnaapput.

Kapitali 5

Danmarkimi Savalimmiunilu efterskolimiinnermut, Danmarkimi fagskolini namminersortuniinnermut aamma paarlaasseqatigiinnernut tapiissuteqartarnek

§ 20. Naalakkersuisut Danmarkimi Savalimmiunilu efterskolernermit kiisalu Danmarkimi fagskolini namminersortuniinnermit aningaasartuutitut tapiissuteqarsinnaapput, tassunga ilanngullugit atuartut akiliutaasa ikilisinneqarnerinut tapit, kiisalu atuartut angalanerini aningaasartuutit akilissallugit, tak. § 15,

imm. 1 aamma 2. Tapiissutit tamarmiusut amerlassusaat ukiut tamaasa Aningaasanut Inatsimmi aalajangersarneqartarput.

Imm. 2. Danmarkimi Savalimmiunilu efterskolernermut kiisalu Danmarkimi fagskolini namminersortuniinnermut tapiissutinik tapiiffigineqarsinnaanermut akuersissutit pillugit Naalakkersuisut aalajangersaassapput, matumani tapiissutinik tiguisinnaanermut piumasaqaatit, tapiissutit annertussusissaat, isertitat naapertorlutit nalimmassaasinnaaneq, qinnuteqariaatsit kiisalu naammagittaalliorsinnaaneq ilanngullugit.

§ 20 a. Naalakkersuisut paarlaasseqatigiinnermut atatillugu aningaasartuutitut tapiissuteqarsinnaapput. Tapiissutit tamarmiusut annertussusaat ukiut tamaasa Aningaasanut Inatsimmi aalajangerneqartassapput.

Imm. 2. Naalakkersuisut paarlaasseqatigiinnernut tapiissutit tunniunneqarnissaat pillugu malittarisassanik aalajangersaassapput, tassunga ilanngullugit tapiisarnissamut piumasaqaatit, tapiissutit annertussusaat, isertitaqqortussuseq naapertorlugu akiliuteqartarsinnaaneq, qinnuteqarnermi periusissat aamma maalaarnissamut aqqutissat.

Kapitali 6

Aalajangersakkat assigiinngitsut

Nakkutilliineq

§ 21. Naalakkersuisut efterskolit nakkutigissavaat, siunertamullu tassunga pisariaqartunik paasissutissanik piniarsinnaallutik.

Misileraalluni ingerlatsineq

§ 22. Naalakkersuisut Inatsisartut inatsisaanni aalajangersakkat sanioqqussinnaavaat, taamaaliornissaq Inatsisartut inatsisaata iluani misileraalluni ingerlatsinissap siuarsarnissaanut pisariaqartinneqarpat.

Atuuttuulernermik atorunnaarsitsinermillu aalajangersakkat

§ 23. Inatsisartut inatsisaat atuutilissaaq 1. januar 2009.

Imm. 2. Ilutigisaanik atorunnaarsinneqarput Meeqqat atuarfiat pillugu Inatsisartut peqqussutaanni nr. 1, 6. juni 1997-imeersumi § 10, imm. 5 aamma § 11.

Imm. 3. Inatsisartut peqqussutaat, imm. 2-mi eqqaaneqartoq, Meeqqat atuarfiat pillugu Inatsisartut peqqussutaat nr. 1, 6. juni 1997-imeersoq, naapertorlugu malittarisassat aalajangersarneqarsimasut imaluunniit attanneqartut atorunnaarsinneqarnissamik imaluunniit Inatsisartut inatsisaat manna allaluunniit naapertorlugu aalajangersakkanik taarserneqarnissamik tungaannut atuutissapput.

Inatsisartut inatsisaat nr. 17, 3 decembari 2012-meersoq (Paarlaasseqatigiittarnermut tapiissutit)^[1]
atuutilernissamut aalajangersagaq una imaraa:

Inatsisartut inatsisaat atuutilissaaq 1. januar 2013.

Inatsisartut inatsisaat nr. 77, 21. novembari 2025-imeersoq (Savalimmiuni efterskolimiinnermut aamma fagskolini namminersortuniinnermut tapiissutit)^[2] atuutilernissamut aalajangersagaq una imaraa:

§ 2

Inatsisartut inatsisaat ulloq 1. januar 2026 atuutilissaaq.

Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfik, ulloq 5. januar 2026

Nuka Kleemann (atsior.)
Naalakkersuisoqarfimmi pisortaq

/ Claus Kleemann (atsior.)

^[1] Inatsimmi allanngortinneqartumi pineqarput inatsisip qulequtaa, § 1 a, kapitali 5-ip qulequtaa, § 20, imm. 2 aamma § 20 a.

^[2] Inatsimmi allanngortinneqartumi pineqarput inatsisip qulequtaa, kapitali 5-ip qulequtaa aammalu § 20.

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut